



澹餘詩集卷之三

北海曹申吉澹餘著

正月三日

三日春光客思紛驚颺隔樹響偏聞平沙亂掩高城日
遠岫寒生絕塞雲倏爾凌空迴朔氣蕭肱當晝失晴曛
天涯莫信陽和轉冷葢疎花淡夕氛

春初偶作

我生愛春和北風乃驕厲晝夜競怒號寒煦互易位裘
馬翩馳逐相逢揖新歲綾文日三百不惜寸陰費諧俗
固恒情矚亡亦無味日淡照平沙滿地冰華碎大化客

旭陽客懷抱獨悴城畔蠹喬柯震撼良不易俯彼墻根
草何用別貞脆

元夕集飲忤庭齋中歸途有作却呈忤庭

花滿良宵酒滿卮十年踪跡忝追隨縱橫揮麈言無忌
爛熳臨風醉不辭簾引星光分火樹月移堞影浸冰池
笙歌幾處繁華徧何似高齋靜對時

午晴

已謝寒爐火梅開淡午晴蜂遊諳舊性鴉聚識春聲殘
帙開初潤綈袍減乍輕遙遙東郭外何處試耕深

春夜入朝賦得響水閣

春水遙從太液通奔湍激響落長空經寒尚帶秋時雨
入耳翻疑塞上風堞影參差高柳外星光搖蕩急波中
年來待漏渾相識夢想沂峰瀑布同

予家百里內山水沂峰爲最

花朝前一日大風寒集飲田沛蒼齋中

春半陽和失驚颺晝欲迷澹雲爭蔽闕餘凍更依堤寒
束花枝斂暝催鳥影低衝塵還把酒携手共雞棲

春分日

上親祀朝日壇叨與陪祀恭紀二首

淑氣東郊外迎曦禮最殊帝臨清輦路兄事祇神居
野曠鐘聲遠松高月影疎平明齊鵠立旭照滿鑾輿

入壇神并蕭 帝降百靈從鐘罷清煙動袍開赭影重
陽光深御幄仙仗雜喬松鴛鷺何多幸聯班接 聖容
過望石園亭不值

繞隄春柳綠含煙惆悵空庭日暮天爲憶去年秋漲滿
山亭深繫木蘭船

終風行

黃雲幾點大如席黯靄低空數十尺動搖初日未分明
眼前頓覺高城隔長安日日苦終風霜尚能白花不紅
經冬歷春無雨雪麋鹿躑躅空山中

卽事

上巳纔過穀雨前遙空飛雪亂春煙杏花頭白丁香老
滿地斑斑榆筴錢

擬韓偓無題詩

空庭微雨杏花時斗帳凝香鎮日垂倚鏡粧遲緣善病
背人心怯類多疑蜂黃最喜添眉暈茗椀翻嫌滅口脂
寂寞繡牀閒不動小窗熟誦漢宮詞

莫春有懷

北闕誰真隱東臯憶舊盟高低尋燕壘晴雨卜鳩聲魚
唼新荷小花侵亂帙清別來春再暮掩戶理茶鐺

題望石新橋

畫橋隨曲折樓畔俯朱欄好待昏時月遙連雨後山波
明深映柳藻密半藏鵬垂釣同凭處濠梁意自閒

別駕行送丘曙戒侍講之武昌

楚山青青湘水白今古蕭條幾遷客屈賈而後少傳人
縱橫見汝文章伯昔予雷峰作逐臣君時珥筆方嶙峋
一麾誰使向瓊島十載同人閱歷頻兵氣漲海行還出
蠻煙蜃雨耽愁疾儋耳驚傳蘇子文山川盡入少陵筆
握手塵中復幾時燈前拭淚辨鬚眉舊游半在長安陌
潦倒壺觴每共持往事徒傷官蹭蹬高談尚覺風流剩
茂陵松柏已蒼蒼吾儕聚散那能定黃鶴樓空天一涯
監州綵服比還家但去莫題鸚鵡賦武昌魚美寧須嗟
閒情遙寄滄浪曲欲唱驪歌心斷續楚才大用會逢時
別駕何由展驥足

送張晦先還雲南

晦先於先外大父門素稱國士
時以賫捧來適逢會葬晦先篤

古人之誼故篇
中記以志感

烏道君無憾驪歌復此時頻經新戰伐不改舊丰儀返
築高賢舍招魂楚客辭殷勤同執紼友誼未全衰
萬里言歸去依狀四牡程
楚人傳諭檄李固有門生吾
道浮沉久人情閱歷平何須追往事別淚已堪傾

郊行口號

行來近郭心偏活，望到遙山眼倍青。
何事桔槔聲更切，夕陽戴勝轉堪聽。

早朝

雙闕尚蒼茫，遙識鐘聲度玉階。
涼若洗月影靜，如露仗舉乍侵雲。
鴉啼將辨樹鳴珂，意自閒何減山中趣。

霧中行北郊作

曉霧沉沉樹影蒼，野光初潤麥秋涼。
雲山欲望不知處，西北遙憐關塞長。

雨中集飲艾長人先生園亭

步屣招携桂醕馨，滿階疎雨客懷醒。
電光入夜穿林白。

雲影當窗隔岫青，鳥語參差借度曲。
方言歷亂各忘形，非耽河朔風流勝。
問道頻來戶莫扃。

獨坐

攤書興屢違，獨坐茗香依鄰梵。
閒清晝庭花淡，夕暉避人羞。
問舍觀世得忘機，莫使簾空掩從他。
乳燕歸。

送王人岳典粵東試

五羊城畔荔枝馨，椰酒醺人不易醒。
萬里珠光扶海日，幾年兵氣暗文星。
全消瘴癘歸冰鑑，獨握珊瑚傲北溟。
望裏羅浮峰色好，枕榔桂樹一時青。

午晴

榴紅葵綠眼中明蝶舞蟬吟趁午晴一卷乍拋高枕上
鄰家擊鼓護槐聲

退食

退食翻能早空階暑氣微池魚晴出曝風蝶午多飛樹
古庭陰合苔深屐齒稀陶狀銷永夏還似掩荆扉

輓馬甸臣侍讀

西清三絕迴難儔歎逝翻傷未白頭昭代科名推琬
琰長卿文采本風流鶴歸猶憶書千卷蝶化空餘筆一
丘松菌齊觀終古事天涯應惜此生浮

闕左門對雨

雙闕曉霞生千門雲氣行暗霑宮樹重涼入遠煙清虹
影侵仙仗山光隔禁城蒼茫渾未散添作御溝聲

早朝遇雨衣盡霑濡出望西山霽色可愛卽景一

絕

禁門雲覆曉光收涼雨侵人澹似秋却望遙峰晴色滿
就中高臥看雲浮

七夕立秋集飲望石水亭却憶乙未初入館卽課

是題賦七言古體一章荏苒間十有一年矣感

賦呈舊同館諸年丈

誰識填橋際河邊一葉飛離情羞對月涼思罷支機地

迴荷香遠官閒俗客稀乘槎倘可問會逐晚風歸
今節人間合十年此再逢鳳飛慙舊咏萍聚感新踪晴
雨移山態涼暄變客容銀河疑不遠常見水溶溶

中元雨山亭觀水燈作

雨餘秋色散空冥水面燈開破晚萍橋畔乍浮深照月
林邊遙映迴疑星暗隨泉脉流爭遠細繞荷香影暫停
更泛輕觴依客座笙歌吹徹夜雲青

白露

白露涼生澹早雲玉河秋急響偏聞風來遠岫迎鴻陣
日照高城散馬羣蛩語經時淒待月角聲侵曉冽穿雲

舊巖桂樹叢叢發三載無人落自紛

秋曉金水橋卽事

霽色偏明輦道間偶來拄笏不知還依微樹杪分殘月
罨藹城頭過遠山帶露烏聲爭戀闕驚秋雁羽乍臨關
徘徊橋畔涼颼起蘆荻蕭蕭影自閒

贈王阮亭三絕

論交十載忝肩隨風雅同心更不疑幾縷篆烟清欲斷
晴窗一卷阮亭詩

清新獨許高徐業

謂蘇門
迪功也

兄弟翩翩皇甫同初日芙蓉

天際想陶韋異代得宗風

縱橫萬里王元美汪南落拓千秋杜少陵小閣西來晴
色滿同君拄笏最高層

夜起聞雁

何處征鴻急閒聲逐夜涼
星明遙辨影露濕暗分行
秋抱蘆邊月寒生塞上霜
帝城有歸夢應共爾南翔

九日送吳虞菴先生歸省

秋深西望遠煙清無那登高復送行
江畔彩衣天子詔尊前黃菊故鄉情
寒生漢浦迎征蓋日落津門
悵去旌醉把茱萸催客棹
相思應念北鴻聲

曉起見庭樹盡脫慨狀有懷家兄

片片驚窗響西風永夜過閒堦
深踏露寒鳥晚依柯獨
樹秋光老浮生旅思多
還遲千里駕相對話藤蘿

九月十九日作宋人亦以是日爲重陽

此日仍重九風流憶昔時
寒雲催塞羽積雨妬霜枝
楓老千山換秋窮萬物悲
經旬留菊醉遐眺負心期

九月三十日作時家兄初至都

西風輕轉曉光涼庭樹依微鳥乍翔
日淡猶懸昨夕雨雲寒欲護早林霜
賴銷旅况耽杯綠擬送窮秋戀菊黃
十載緇塵雙眼濶鄉心細細話連牀

立冬日集滴翠園同崔老山蒸松友王阮亭暨家

兄升階二首

秋盡空煙裏，耽幽逐夜涼。庭閒偏受月，樹老迴宜霜。人影浮寒渚，歌聲韻野航。還疑輞川上，同結薜蘿裳。

水氣臨冬斂，平收夕照閒。孤猿寒抱石，羣鳥晚依山。月淡蘆花白，波明樹影斑。勝游常可續，何事憶柴關。

送張螺浮都諫之任荊州

螺浮以建言得外遷也

讜議翻無諱，吾徒似者稀。殷勤瞻

帝座，辛苦為王畿。直道何蕭索，浮榮少是非。空嗟榆塞雁，并逐楚雲飛。

西南煩坐鎮，雅望復荊州。蘭芷騷人賦，瀟湘帝子樓。霜

清三峽杳，江遠萬山浮。竚見虛前席，寧須詠四愁。

雍州余舊跡，峴首幾追尋。此去君何恨，湘流一倍深。危言臣子事，遠別友朋心。坐嘯應多暇，遙知北望吟。

野夫送梅二本即舊所蓄也偶賦

野人還贈野田梅，位置頻勞手自栽。乍似開簾延舊友，終期映雪試新醅。龍賓靜對雙株老，石丈欣逢二妙來。好護深寒垂短幕，幽花細放不須催。

題三張公合傳三首

北海誰高躅，西銘獨老成。摘瓜寧抱蔓，烹鯉遂埋羹。

二軼

事見公別傳

辛苦傳經業，蕭疎薄世榮。只今涼水畔，彷彿讀

書聲

右孝廉公紹海

孝友推張仲音徽想像中

予稚時識公狀

鴻文人自妬龍腹遇

終窮世擅臨池譽門高結駟風縹緲今有託博物茂先

同

謂杞園也右明經公學海

先代傳遺直西園想勝游埋輪青史在開墅淥尊浮風

雨荒三徑圖書冷一丘嘉謨堪永世片紙折通侯

公傳中有

折誠意伯書甚佳右侍御公觀海

夜

擊筑遺聲何處聽寒催急柝夜冥冥薪車風細秋霜老

菜市埃昏鬼血腥遠塞星河侵樹黑遙天燈火逼雲青

塵中倘有悲歌客濁酒生涯一半醒

送家兄東歸四絕句

三載一為別徒嗟相見稀朔風終日急目斷旅鴻飛

得句欣相和十年只此時那堪風雪夜獨誦鶴鴿詩

殘雪滿修途處處馬行跡隔歲倘重來雪盡應難覓

饒有家園興題詩北郭頻歸逢春酒熟遙酌未歸人

寒中偶興却懷家兄

寒聲催短晷夕氣散遙陰河淺冰偏結城高日易沉十

年塵外跡千里雪中客路今方半離憂一倍深

偶憶

海畔高城山下村輕寒天氣半晴昏却同野叟疎籬外
坐擁綈袍曝午暄

風寒感舊東松友學士

風寒盡日閉門居殘雪盈階倦掃除客舍只堪容一榻

浮名曾憶賦三餘

舊館試三餘篇
為館師所賞

夢驚蝶影醒猶在冷

比梅花靜不如辛苦當年同毳帳談經從獵事成虛

遐眺

遐眺情偏結其如歲暮何山遙晴雪見日落野風多雁
渴羣依水鴉寒半聚柯朱門渾未識處處接笙歌

奉和高念東單拙菴兩先生唱酬之作四首

廿載瀛洲兩俊英肯容後進接深觥醉思嵇阮堪藏拙
病覺彭錢善養生大藥自程文武火浮雲齊視古今名
八荒物外情何極傾耳鈞天對月明

妙緒霏霏屑玉英餘杭佳醞更盈觥初成黍米心田熟
乍接桃源眼界生海上乞漿真玩世橋中削脯類藏名
忘言此際參同契立雪何妨直到明

殘菊還堪問落英忘年同覆手中觥仙方豈合塵間老

詩思原從悟後生敢信黃金填姓字

用淮南
李珣事

終期白眼

謝才名風流千載慙勾漏爐內丹砂永夜明

雪餘梅蕊散芳英香影臨風落酒觥千里鷗盟偕客夢

百年泡幻愧浮生東瀛自昔容仙隱西竺何人號淨名
欲證靈修須慧業將無同處一燈明

念東先生以詩謬見獎許再次原韻奉酬

遺世丰姿濟世英未因丹竈廢持觥應知吏隱兼仙骨
漫許前賢畏後生佳句瑯環傳秘識道心湖海謝時名
聊同拄頰矜蕭散雪映西山一帶明

水牀行

長安冰牀穩於屋大不盈丈足無輻遙望還疑河上舟
片帆不見行空速數人箕踞一夫牽寧似篙師徒碌碌
北風吹寒冰正堅兒童奔挽兼水陸更籍墮毬耀眼明
衝塵足倦羣相逐寒威漸減春漸來天道由來易轉覆
一日須牽一百回乘時早渡愁足踏須臾河畔柳新青
驢丁歡喜爾曹哭敲碎冰山喚賣冰銅盤自擊冰千斛
封印後自嘲口號

漫矜讖牘總如山且放衙叅學閉關一歲論囚過八百
清時誰信法官閒

永定門外雜詩二首

依依輦道半生苔南指離宮夕照催侍從還思十載事
五更疲馬踏霜來

平沙亂堞擁城根殘雪猶侵野草痕千載論功辛苦事

悲風蕭索舊柴門

六日貯雪罌中偶成四韻

長安清事減藏雪及春期寒聚爲山易光凝得月遲石
邊深可掬竹杪潔偏宜留待茶香後旗槍欲闕時

人日雪中野眺

雪深天地合入望轉空濛鳥度冰潭側人行玉鑑中山
遙微辨岫野曠迴聞風更想疎林外煙光漸不同

出廣寧門望西山時送家慈歸里

曉出高城外羣峰入望新遙將天外眼寄向山中人春
色鄉園蚤離情骨肉真空令游子淚霑灑去車塵

八
花朝日早朝

貽蕩花朝節芳菲上苑時春迴金殿早寒減玉堦遲落
月懸三尺棲鳥戀一枝御溝渾未辨天外聽流澌

咏琉璃瓶中朱魚三首

噴沫揚鱗樂有餘悠然湖海事全虛須知益盎容身處
已傲西江涸轍魚

素質空明絕點塵綺窗迎日漾朱鱗他年爾若乘波去
須認琴高作主人

游泳虛空澹碧漪珊瑚一點浪中垂只將花影尋常啖
不向滄江泣釣絲

春陰

漠漠春陰淡，早空窗光落。几墨光融，花遲甘讓三春色。
雲薄能禁一夜風，繞屋垂楊殘雪裏。隔簾啼鳥曉寒中，
未知芳艸城南陌。綠到溪邊第幾叢。

二月晦日作

是日拜自陳疏

二月成虛擲，閒心任跡忙。輕寒遲燕壘，小雨妒蜂房。
藥細微茫，火花清斷續，香疎慵誰得。似歸計託封章。

報國寺松

雙虬低偃俯蒼苔，千載名香歷劫灰。滿地翠陰春雨後，
幾人閒爲看松來。

三月一日作

雨雪暗春城，春城雜鳥鳴。寒疑羣卉弱，病覺萬緣輕。
樓闕天邊影，波濤樹杪聲。小窓梅蕊發，寂寂待清明。

寒食

寒食芳郊路，煙平柳半黃。經春常似病，出郭乍如鄉。
晴引山光近，涼分塔影長。踏青紛有約，何獨懶壺觴。

展外大父墓

西州遺痛客，思紛寂寂林。花暗不分寒，食雨沾寒食。
土異鄉人拜，異鄉墳鶯聲迴。出長堤柳野，哭遙生薄暮雲。
清絕高梁橋畔水，閒來細數鷺鷗羣。

清明書所見

清明臨廣陌徘徊安所之
壺觴羅道左丘隴何纍纍
人鬼誰賓主野艸空離披
士女旣雜坐少長互參差
行樂塚墓間寧知歡與悲
桃李不復花荆棘蔓枯枝
好鳥鳴乍歇唯多鳶共鴟
勸酬久無序衣冠行傾欹
日暮荒風至不惜言歸遲
何如京洛客修禊伊川湄

送于子先司李歸德

梁園名勝昔曾過十載同人戀薜蘿
子先登第十二年始得官此去聲華天際得當年
詞賦宋中多清時治獄門堪大法吏
心閒政自和文筆期君高李輩河邊懷古一長歌

送胡愚亭司李漢中

太白山高隔漢中煙巒曲折徑纔通
春迴尚帶千盤雪君去還乘六月風
賦就過秦推賈誼經傳相漢識于公
更饒彩筆憑佳興危棧題詩處處同

折枝牡丹

名葩紛上苑分折到閒門
窺鏡紅如笑依簾翠欲翻
風吹渾不妬香滿竟何言
尚憶陪游處花叢覆輦痕

雨中過金水橋

天半行來曉氣清
斷雲疎電轉分明
蒲梢五尺禽千啀
更被蕭蕭雨打聲

滴翠園絕句

繞岸蘆深柳影齊，隔簾香動芰荷低。
鳥聲拂水魚吹浪，石罅微明日漸西。

閏夏

紀閏宜初夏蕭然退食時，病侵詩思減閒覺。
午陰遲榴火驚虛牖，荷光漾碧池避人移小榻當戶受微颺。

王迂叟由僉憲遷奉天京兆詩以送之

天外陪京遠，水傍君行五月帶冰霜。
周家根本唯豐鎬，漢代功名重趙張。
攬轡乍臨關月迥，褰帷獨對海風長。
丹砂何必求勾漏，自有方平麟脯香。

迂叟好道故云

奉和艾長人先生小築初成見示原韻二首

薜門苔徑竹方椽，荷小新鋪水面錢。
雙屐靜隨鷗出入，一塘寒浸鷺連拳。
高臺影接雲邊岫，細艸光分野外煙。
更約科頭深樹側，杯香同看月如弦。

亭低處處俯朱闌，曲折當門引碧湍。
觸目煙霞三徑足，避人丘壑一心安。
桃源乍闢迷雲榭，丹竈初移對鶴壇。
愧我塵容陪勝賞，好憑歸夢寄漁竿。

晚雲

出岫曾何意，卷舒欲暮天。
隔城遙帶雨，近樹暗浮煙。
乍斂山腰重，微明日脚懸。
更須分彩暈，深處護蟬娟。

同人集飲望石園亭

亭臺幾曲徑初開雲引山光入鏡來繞浦煙沉迷小艇
當門屐重破新苔魚游乍濺荷邊雨鳥歇還驚柳外雷
就摘碧筒傾白墮笙歌緩奏不須催

野行

曲逕穿禾黍高低信馬歸人依槐影醉鳥傍井欄飛片
雨通遙岫孤煙隔短扉遲遲度城郭夕照轉霏微

立秋夜作

積雨催秋至虛窗一半明光分殘月影涼入早蛩聲風
細初侵簟雲歸尚隔城收爐滄海畔三載廢躬耕

馬覲揚名飲同熊次侯王冰壺董易農

花掩琴尊竹掩扉同人心賞莫教違蟬紛遠樹吟秋葉
鶴舞空庭曳客衣寂寂茶香清露集高高柳色夕陽歸
徘徊永日勞相勸此會塵中覺漸稀

所見

玉階深處見流螢帶露穿雲逐曉星飛過御溝紛不定
亂蛩聲裏草青青

秋夕有懷

乍見涼颼轉空庭夕氣浮樹高先受月人靜不驚秋蛩
語臨窻響螢光抱砌流願言東海上去訪采芝游

晚行宿野寺作

晚行堪待月東上倚雲根鳥歇林光霽蟲鳴豆葉繁秋
煙紛野逕涼露下高原入寺鐘聲寂還清旅夢魂

送戴岵瞻歸越中

十年高臥浙江湄鴻跡重來豁所思機靜祇同秋月皎
歸遲唯恐海鷗疑浮沉我類東方隱去住君憑詹尹知
願學無生塵念絕因茲鼓棹復傷離

奉命致祭南嶽偶成二首

帝命乘輅出湖湘亦舊游才慙三禮重地滙萬川流閱歷
勞青眼行藏伴白鷗衡陽遙可想七十二峰秋

五嶽今方一浮生興不窮香分天子詔秋老大王風

楚澤荒煙合中原落木空名山真誥在那與臥游同

將出都留別諸同學

握手臨風攬敝裘塞雲遙接楚天秋半生婚嫁慙高躅
萬里山川入壯游客興自隨鷗共語去程好與雁同謀
帝城知己勞相念目極瀟湘獨泛舟

安肅道中

日向天南逐使星荒煙疎柳短長亭幾時秋盡湘江岸
坐對君山一點青

保定署中蚤起偶成

城邊清漏絕窓際曙星微燈細孤煙動庭空萬籟歸起
聞松露滴坐愛竹禽飛行矣秋風裏那能憶釣磯

奉答艾長人先生留贈之什

驅傳天涯客分攜 內殿香後塵常得逐前旆尚相望

嵩嶺笙兼鶴湘濱月帶霜偕歸應計日酌酒話奚囊

慶都道中再寄長人先生兼懷冰壺先生

九疑迢遞四千里三輔驅馳六七程映水柳條未憔悴
經霜柿葉轉分明浮雲落雁中山國寒日荒丘堯母城
咫尺望君還不見東瞻畫鷁遠含情

伏城驛早發

吾行方作客颯然秋已暮侵曉戒前旆微霜覆古路日
出林杪青涼風生遠樹北雁隨我車飄忽復南去影滅
平沙間遙遙不知數雲山西逶迤千里莽回互淒清謝
旅夢躊躇臨野渡客思懸天末浩如水東注

賦呈梁玉立先生

洛下風流鄴下名居狀後進侍深觥百年甲第圖書古
一代龍門冠蓋榮黃菊欲開還命酒青山無恙早歸耕
聖朝闢館思元宰爰立終期信史成

過趙州

微雲覆水擁城根指點惟餘瓦礫存當日囊錐容國士

後人絲繡愛平原孤丘數尺秋風影遺鏃千年野土痕
更問高橋仙蹟在荒唐遑事不堪論

至順德留別長人先生

前驅翻悵望秋冷古邢州千里昨宵別孤雲此地愁殷
勤憐楚道拂拭愧吳鈎唯有叢臺月清光兩處浮

沙河卽事

平沙無際接雲根極目翻同古塞垣乍結長堤埋短碣
漫隨流水掩孤村臨風忽訝花成霰近樹還疑絮有痕
寄語征鴻無宿處此中應憶稻梁恩

黃梁夢二首

昔人方悟夢來者復疑真處處邯鄲境蒙莊別有神
遽遽誰獨覺栩栩爾先知爲報仙翁道黃梁少熟時

邯鄲道中

清絕邯鄲道蕭蕭晚渡河雲分山勢斷風急葉聲多大
野秋煙合空林夕照過紀程千里遠欲問夢如何

磁州道中

使車重適豫西望愛林閩野日臨關白
途中有車騎關秋雲隔
嶺疎柳寒青拂岸荷老碧侵渠景物饒佳興憑誰共結

廬

渡漳河

濁水西來渡屢移遙分岡勢影參差九秋木落空山出
十里沙深小艇遲城畔風雲留晚照道側有講武城舊趾臺邊鳥

雀動寒颺

銅雀臺亦在河畔

蒼狀古道無窮思鄴守千年定有

祠謂西門豹也

題天琴亭

昔人論琴理難於指上聽淵明好無絃言下聲泠泠誰
知天地音悠狀會此亭鼓掌清籟集抵壁亦鏗鳴人去
聲俱寂彷彿衆樂停起看秋月白迴眺秋樹青浩浩有
奇趣因之暢性靈

宿宜溝驛作

古驛空明漏欲分虛窗蘿月白紛紛夢依馬跡臨淇水
心逐鴻聲入楚雲秋老柳條和露脆夜涼松子墮堦聞
曉來應負登高約可有黃花對夕曛

九日衛輝道中寄懷長人先生

茱萸已任酒杯空令節關心野菊叢作客難期嵇呂駕
逢人欲問邯鄲風棲遲白雁浮雲外斷續青山夕照中
矯首蘇門長嘯侶登臨無計與君同

渡黃河作

長河勢遠接天平岸柳扶疎解送迎安穩中流帆一片
舟人指點汴州城

河邊遇高遜業自鄉中來云將之楚訪道予嘉其
意邀之共濟卽舟中賦三絕爲贈

海上淪漣舊水聲真傳豈是世間情
黃河九月濤如此君欲尋仙何處行

勇猛辭家遠學仙囊空萬里不持錢
相攜名嶽真吾事秋盡逢君河水邊

憐君瀟灑大河濱談笑中流意氣新
漫羨仙舟同李郭何如采石錦袍人

贈陳留丁令泰

予同郡日照人

亂離悲昔日童稚識交情
盛代同霄漢難聲各弟兄

經秋隨雁影問俗聽琴鳴
碩望黃門舊傳家政已成

尊君

給諫先生無恙

太康道中晚行

數騎穿林樾高低間夕陽斜
風驅鳥雀細逕出牛羊問俗豐年樂
停車野興長竚看新月上人影晚蒼蒼

又

懷古能令客思傷荒城南望正茫茫
衣冠六代推陽夏游豫千年戒太康
大野驚雲孤雁沒窮秋落日半林黃
奚囊猶是當時舊好伴方筇入楚鄉

昔已亥歲杪予由荆南叅藩移睢陳備兵使者不

五月而內遷去今銜

命之楚路出宛丘感舊賦懷二首

七載并州舊乘輅此再來柳湖前輩蹟著艸古皇臺尚
憶登臨咏終慙臥治才浮生真過客覽眺幾徘徊

父老遮車拜仍褰舊日帷請纓成往事典禮幸清時川
白淮陽閣山遙峴首碑機緣良不偶兩處采風詩

又戲作

五月棲遲憐宛水半生踪跡類浮雲寄聲騎竹兒童道
曾否當年識使君

霧中發陳州

四野陰垂霧濛濛晝不開沾林成碎雨籠水類輕埃雁
度紛難識鴉飛濕乍迴祗疑秋色裏深入白雲隈

伏虎行

陳州已過蔡州始野徑蒼涼日百里深莽危橋不可行
有人抵掌談虎事虎窟潛營官道邊紀數維五聲哮狀
雄姿晝匿林光黑夜夜晴從林外懸村民結束俄成陣
虎穴須探况在近壯夫手搏今吾徒畫虎寧如生虎駿
乘輿驩呼勇怯同林間蕭瑟聞腥風鉦不及鳴矢未發
虎伏忽躍叢簿中老拳兩中爪鋒惡一夫長辭一夫臥
虎勇人怯今始知事皆目擊日猶昨是時秋晚雨泠泠

道旁說虎亦可聽草長樹短疑蠢動遙指空林色杳冥
虎來虎來胡爲者不伏深山伏平野中原淒索爾爲羣
何用相隨渡河也

早發上蔡

昨朝微雨孤城黑半夜霜風吹草白薊北天中一月程
遠役轉憐時序迫斷雲野日少輝光洞庭南望千里隔
行矣天涯雨雪時扁舟更作三湘客

確山紀事兼贈吳令璵二首

何意荒榛裏孤城背亂峰寒聲浮遠水夕景下高春樹
老通猿穴雲深響鹿蹤祇愁明日路石徑曉霜濃

小邑嗟難問輪蹄去住頻峰隨殘堞轉樹傲晚霜新野
犬驚人迹空堂訝虎鄰朗陵遺勝在瀟灑寄風塵

確山道中

羣山中斷處石徑豁然開萬壑沉秋霧千村剩劫灰廟
荒圍薜荔碑古蝕莓苔心折危溪水泠泠去復回

過長臺關渡淮水

清流如帶午潺潺秋盡長淮第一關莫訝山深無去徑
南行更隔萬重山

發信陽有感

霜裏驅車日日程偶來曲折看山行何宗夙擅天中秀

謂仲嘿也瀟水頻經亂後清
隔岫煙霞遙辨影
傍巖草木不知名
孤城尚有無窮恨
六代蕭條舊戰聲

山行紀事二絕句

鳥道盤空萬壑迷
丹楓翠篠近人低
樹深不礙峰峰秀
數畝閒雲是稻畦

濃淡山光四望賒
谷中茅屋半欹斜
鳥聲却似春深好
開盡溪頭野菊花

雨中過平靖關

一名恨這關

拾級攀危磴
涼生夕氣佳
山深遙入楚
水細曲通淮
挂樹猿食果
尋泉鹿引儕
雨來關一線
恨是天涯

抵楚界述懷十七韻

一麾昔出走
受命楚西陲
請纓辭弱翰
仗節登危陴
回首戎馬場
心折漢江湄
洎茲踐華省
幸際昇平時
顧乏文章用
謬承禮樂司
執帛告名嶽
將陳璧與珪
楚鄉山水緣
豁此平生思
耳目悅靈曠
筆墨玩清奇
雲夢風蕭條
黃鶴影參差
洞庭四望濶
鸚鵡千年悲
椒漿屈賈廟
寒日岫嶁碑
鼓棹泝三湘
憑杖眺九疑
告虔禮云畢
蠟屐志方馳
容與泛輕鷁
閱歷同采詩
庶揚天子庭
陳彼疾苦詞
圖壁追雅尚
臥遊聊可師
誓還理征駕
永與禽向期

雨中山行

濛濛終夜雨雲在半山中宿處煙霞靜行來竹石通流
懸千仞碧樹老一巖紅樵牧聲俱寂應逢採藥翁

早發德安

城畔曉霞紅山川指顧中霜遲邛子國雲薄楚王宮北
控羣峰盡南聯大澤通勝遊殊未已次第攬雄風

由黃陂至江夏道中作

河流曲折客懷同曉出西陵雲氣中江漢忽來天際合
瀟湘一望楚原空青懸橘柚千村雨綠剩蒹葭兩岸風
極目涼生帆外遠磯邊黃鵠影濛濛

泛小舟泝河十里入江口復登陸口號二首

客裏孤帆穩江邊小港通便同簑笠叟風雨亂流中
艇載江湖興濤增風雨聲峰頭遙可數杳杳武昌城

雨中登小閣隔江望黃鶴樓有懷

水國行多雨竭來值秋暮北風號晝夜踟躕漢口渡登
臨愁白浪冥冥勞四顧隔岸眄危樓朱甍若烟霧古來
馳名勝才盡崔顥句佳什至今傳仙人渺何處極眺但
蒼蒼雲遮漢陽樹黃鶴爾飛來予欲凌江去

江邊見黃菊叢茂偶賦

物候江邊異東籬葢正香花寒今十月波靜古三湘常

對帆前雨偏遲影外霜餐英千載賦獨咏意彷徨

登舟將之湖南留別丘曙戒

晴江一望遠波平夕照頻催鷁首輕雲際青山湘女廟
天邊黃鶴楚王城鴻聲暮入千峰碧漁火涼生一帶明
欲問洞庭水深淺何如十載故人情

舟行卽事

鳴榔衝荻浦伐鼓出沙洲日澹雲仍閣波平霧半收鷗
浮隨片槳豚拜響中流隔岸烟沉裏漁歌略唱酬

泊金口驛

中流爭峽過清絕楚南天纜急知風轉帆低覺浪懸亂

簷千尺岸午爨一江煙更問荒村宿衡陽何處邊

泊上簾洲

風逐孤蓬轉涼生返照中穀文雲似水弦影月疑弓野
樹臨江綠漁燈隔岸紅蕭蕭蘆荻響應有北來鴻

簾洲早發

盤渦勞百丈力共一灘爭曲折唯看日風波莫計程漁
簷隨岸勢石齒動江聲枕上驚濤慣鄉思夢後生

雨中泊竹林灣二首

風雨荒江大浮踪入夜微悔深勞內訟險逼貴忘機白
浪危檣轉青山遠夢歸自憐寒漏永空羨斷鴻飛

波濤心屢折繫纜大江濱行止關鷗鳥安危託榜人亂
山連夜雨孤棹異鄉身檢點浮生事唯堪釣叟親

乘風過臨湘泊白螺磯二首

棹入蒼冥一道開長流滾滾易興哀帆前忽擁千山雪
耳畔常驚六月雷絕壁下臨蛟蜃室狂瀾深賴鬼神才
舟人笑語渾閒事壯志乘風已作灰

盡日中流與浪爭危磯怒拍兩崖平一帆月黑天無際
萬里風搖地有聲烟裏偶浮孤磬動寒來翻覺敝裘輕
那堪更聽蕭蕭雨此夕能催白髮生

泊巴陵城下

巴丘遺戍在孤棹宿雲端遠界千盤碧平收萬派寬帆
銜殘照小月上夕波寒明發君山側中流指點看

巴陵阻風四首

巴陵城下曙禽啼北雁聲多影尚迷咫尺君山不可到
濛濛江月近人低

平湖極望北風收估客南來葉葉舟但使布帆皆穩渡
何妨十日坐灘頭

洞庭昨日曉霜濃木落湘山第幾重聞道方筇堪作杖
相扶直上祝融峰

偶向瀟湘聽斷猿斑斑千載泣龍孫楚南近日蒼生淚

不是當年帝子痕

君山紀遊卽贈連司李應鄭李巴陵爓

楚鄉饒奇勝茲域信清曠岳陽五日泊山靈如我睨夙
游欣二妙探奇敦雅尚湖光千里昏浩狀元氣壯天水
相迴映雲峰互滉漾小艇類浮鷗了了辨青嶂獨秀豁
中流屹立絕依傍杉竹森蒙翳石影驚濤盪佛閣舊崔
嵬堯女墓相向捫巖穿篠徑足眩勞一杖軒轅臺已荒
柳毅井空悵風雨集崇巔鴻濛騁遠望佳處領其要曲
折遺想像夕鳥倦歸翼鳴磬晚波上返棹泝微颺岸火
明漁唱巴丘夜色蒼孤舟夢愴恍

過洞庭湖

只訝連峰走中涵萬頃流精靈湘鬼廟風雨洞庭舟浪
急千帆白山遙一點浮悠狀元氣合生事等輕鷗

湘陰

蕭瑟黃陵廟依依帝子靈渚邊蘋自白湖外草猶青雲
薄紛遙岫烟寒隔淺汀當年虛九辨高咏有誰聽

長沙懷古

十月潭州天氣涼夜來獨臥一船霜山聯五嶺瀟湘合
地界三苗翼軫傍岫嶺神功懸嶽麓飄蕭雁影隔衡陽
千年賈傅才偏盛卑濕何緣滯楚鄉

周晉侯中丞召飲西城樓賦贈

風煙歷落暮江頭
客裏登臨共此樓
鴉引寒光翻極浦
山銜夕照入孤舟
憑觴忽盡三湘色
倚檻平銷萬古愁
天外故人還坐鎮
何如元凱在荊州

長沙早發

日從枕上看山行
宛折湘流一帶清
五嶽機緣初蠟屐
百年烽火乍銷兵
侵帆雲影垂垂碧
夾岸嵐光冉冉明
賤買木奴勤命酒
扁舟泛宅是平生

野泊

小艇波心黑
繁星共一灘
崖懸通篠徑
鐘細出雲端
虎跡荒江大
猿聲永夜寒
乘槎真萬里
斗北是長安

過三門灘

垂綆中流澁
何年斧鑿痕
雲帆驚百折
石齒盪三門
險過喧灘子
湍迴泣岸猿
羣山如揖客
依約領黃昏

晚過昭靈廟

雲起荒祠側
空江半杳冥
我猶悲正則
俗自祀昭靈
湘澧千秋賦
椒蘭十月馨
峰峰殘黛色
遙接九疑青

小舟夜發

枕畔響潺湲
潏懸流度幾盤
月高天乍曙
舟窄夜增寒
宇宙浮名小
江湖遠道難
數聲霜裏鳥
侵曉喚漁竿

衡山道中

輕帆觸浪曉漫漫元氣中流自鬱盤
萬里奔湍浮野日半天高霧捲晴巒
巒鳥聲穿壑烟初動漁網排空影尚寒
嶽頂雲開千古事明朝試拂畫圖看

抵衡山縣作

雲際一颿輕湘南兩月程鷗能隨遠泛鴻亦怯孤征嶽
色平侵郭江流曲抱城夜涼羣籟息寂寞道心生

澹餘詩集卷之三

終

澹餘詩集卷之四

祭南嶽禮成敬紀四章

北海曹申吉澹餘著

縹緲高峰天半看依稀鳥徑接巉岈千盤迴出當空秀
一杖遙知絕頂寒遠道山川歸使節清宵煙霧隔仙壇
白衣舊有棲霞志擬向深巖問懶殘

羽蓋霏霏紫氣翔還同牧伯領南方山靈笑拂龍鸞影
天語遙生艸木香月午參差涼竹樹嵐低蒼翠滿衣
裳留連福地耽佳興指點虛無望帝鄉

樓閣飄飄赤帝居悠然天籟響空虛湘沅九道同衣帶

泰華千秋自友于神值懷柔紛欲降才慙封禪定焉如
雲中絕壁深難度知有當年玉簡書

包括雄風峙楚宗森森臣庶俯羣峰禹功文字傳科斗
火德天施號祝融絳節千靈扶日近金泥百代接雲重
向平夙約應相誚濟勝才疎愧短筇

贈山中李道人常庚

道人予同郡離俗在明天啓甲子

我行名嶽裏期有異人逢果見煙霞客言從縹緲峰塵

緣銷遠樹勝業隔疎鐘

予時憇勝業寺

四十年來事依依故國

容

山朱陵洞口遊九仙觀二首

松生石罅任雲遮洞口時開野菊花步步泉聲留客聽

青青山影上衣斜

四山環處萬竿橫踏徧蒼苔石徑平花裏仙壇來午磬
峰峰啼出畫眉聲

途中絕句

樹拂青冥水浸渠家家多傍竹巖居嶽光偏送斜陽蚤
圖繪人間總不如

歸棹

閒憑歸棹一長歌覽勝當如別去何面面雲山分向背
行行旅雁隔關河壯遊尚覺浮名繫百感偏增歲暮多

家國茫茫俱萬里那堪終日慎風波

舟中口號

日日齋心參玉版時時酌酒試黃柑風味他年知最憶
鳥聲山色洞庭南

霧

水國夜偏寒江上行多霧我來名山側步步勞返顧九
背還九向曲曲湘流趣舟楫窮所歷野泊無定處一氣
迷昏且咫尺荒煙聚蒼鬱天邊岫蒼茫巖際樹雞犬白
雲深猿鳥青冥住孤帆已百折遠道更千慮灘子嶺早
發踟躕愁虎渡日色盪遙波咿啞凌虛去

過昭山

往來只愛昭山秀石氣峻嶒絕處看松桂蒼蒼潭底影
隔江鷗鷺不知寒

晚泊

寒煙隨夕照孤棹去來輕波湧疑星動帆移覺樹行暮
雲聯岫紫野火入江明十月湘南盡非關戀濯纓

北風

北風渾日夜城畔積波濤氣挾江聲壯寒增岳麓高雲
低催雁急雪重助猿號歲暮湘州客朝來戀緼袍

長沙絕句二首

洞庭南畔是長沙寒日淹留使者槎欲問當年賈誼宅
荒城月黑祇棲鴉
旅泊天涯幾日陰北風吹浪轉蕭森雪花飛過洞庭去
愁對斑斑湘竹林

賤日志感

白鼓南天棹常懷北海尊形容吾漸長歲月爾何頻寒
入江湖小天低雨雪勻深杯殘燭影聊慰未歸人

又長歌

我生三十有三年落落塵中常作客幼經離亂長驅馳
壯齡已覺時光迫早操弱翰入承明十載多在長安陌

欣來名嶽探奇勝靈奧知是神仙宅使車空返綠尚慳
大藥仙芝難苟得屈指星沙十日留茲辰偶值天涯色
古稀七袞今將半惆悵人生不滿百無生未學損朱顏
鬢髮何由得終黑不如把酒且長謠岳麓山青湘水白
慷慨中來不能醉酒半有懷空嘿嘿方丈遙遙瀛海東
吾廬亦在勞山側安得乘風一棹凌滄溟舉眼還窺洞
庭窄

長沙雜詩二首

湘州遺俗古分野軫邊星塗壁家家赤開門面面青蕉
深三徑暗魚賤一街腥屈賈風何杳空嗟十日停

城畔青無際沾霜艸未枯山深留雁羽日暖長雞雛父
老頻經戰官僚半欲逋石尤遲客棹歸思滿江湖

長沙北野泊

蒼茫月上遠波平燭影中流一道明水國陰晴饒變態
天邊猿鳥動寒聲山川歷歷迎歸棹竹樹依依辨去程
三戶由來煙火少每憑野岸倍含情

阻風

風阻荒江路鳴橈去復回奔濤連岸動野燒隔雲開鳥
急寒相向山空窈自哀客舟遙可妬片片掛帆來
僮輩走亂山中折梅花數枝置瓦餅內爲賦二絕

曲逕攀蘿一杖登折來冷蕊伴孤藤呼僮欲問探奇路
香到山中第幾層

野岸欣逢世外姿因君却悟歲寒時輕舸載得湖南勝
江畔梅花一兩枝

雨

洞庭湖畔雨盡日影冥冥濶浪侵雲際長風挾水靈鴉
飛孤棹黑豚拜亂流腥歲晚重陰逼空傷滯使星

湖畔

青草白沙度幾盤北風吹雁晚聲寒扁舟三日洞庭岸
始信江湖行路難

又
舟影月明中平沙面面風依朕天水合萬里鏡光同

又
月入寒波霽天涵遠岸開夜深鷗定後猶有棹聲來

發城陵磯過臨湘新隄諸處覽古有作

巴丘儼形勝羣川爭滙聚粵水暨蜀江城下合東注輕
舟歷峭折波濤雜煙霧夜宿城陵磯午過鴨欄戍微颺
集歸檣浩如騁飛鷺萬象翳錯陳奔流不暇顧烏林昔
阨隘緬想龍戰處魏武紬遠略空傳橫槊句乘勝遽成
驕雄圖遂鼎據遺蹟亘千秋治亂紛回互夕陽下野岸
饑鳥啄寒樹撫懷傷今曩欹枕揚帆去

過祭風臺

荒臺遐眺倚晴曛彷彿遺颺江上聞楚地四維皆百戰
隆中一諾便三分當年霸業空殘壘終古山光起暮雲
盛代卽今烽火息磯邊漁釣自紛紛

夜發抵嘉魚二首

歸舟貪早發山水共蒼蒼野岸平分月漁簑飽受霜夜
寒雞唱遠江靜櫂聲長入臘孤征客行吟類楚狂
舟涼兼漏永江上北風多燒急人防虎沙晴霧隱鼉客
心懸日月波影動星河每怪危檣轉當如遠夢何

赤壁歌

高高赤壁臨江涘一戰當年成鼎峙
搶攘南北號多才吳蜀君臣魏父子
阿瞞東下氣何雄鴟張虎踞笑江東
荊州已降昭烈走烏林蟻聚千艘
幢橫槩還能賦明月投鞭擬欲乘
長風檄傳會獵虛聲動吳下翻多
囁嚅翁囁嚅紛紛那足數國士由
來出儕伍公瑾醇醪美少年臥龍
魚水真臣主片言契合紫髯奮羣
賢勢足斂風雨一炬俄看漢祚分
英雄割據終黃土何事江邊尚有臺
寒樵野釣日徘徊興衰轉轂同一
瞬長流滾滾無時迴壯略寧期千
載後空留殘壘向人開高陵深谷
俱寂寞

祇今憑弔傷奇才夜來獨過空山
暝荒祠月上清波影自汲中流垂
短綆呼僮洗研還烹茗

潭州阻風二首

楚澤饒風雨荒洲二日留魚龍寒
改窟鳥雀濕隨舟浪濶浮天影雲
低動客愁計程憐遠道憑櫂羨輕
鷗野岸茫茫動鄉心脉脉賒一生
多遠客臘月尚天涯陰逼蛟龍盛
寒生雨雪斜虛疑銀漢接無計泛
星槎

雪夜

洞庭北渡氣蕭森野泊閒銷幾日
陰飛霰隔江明遠岸驚飈拂樹墮
鳴禽亂雲凍合孤舟影永夜寒生
萬里心

安得折梅還蠟屐滄浪漁父許相尋
窮陰迷楚道城內亂山多鳥影低寒雨雲光澹晚波故
園荒薜荔孤棹阻江河安得晴帆轉吾當趁釣簑

武昌雜詩三首

鄂渚一帆停高城色杳冥臨江茆舍白經雪菜畦青豹
霧連山暗鼉風拂浪腥南天多語鳥日日雨中聽
隔岸晴川影帆檣觸浪奔禹功江漢大楚俗鬼神尊地
濕陰常盛天低日易昏荒洲猶寂寞詞賦擬招魂
入夜覺寒增山中雪幾層經旬稀見日絕岸半依冰遠

夢堪尋蝶浮生只杖藤危樓仙蹟在今古記誰登

雨中晚登黃鶴樓同丘曙戒別駕

茫茫萬里楚煙收日暮登臨江上樓帆影高低紛遠浦
山光明滅枕寒流雁鴻暗入浮雲色鸚鵡遙生異代愁
天半相携還把酒滄波回首舊瀛洲

雨雪初霽偶登高臺望隔江大別山

望裏青無際山高影乍晴經旬常杳靄隔岸倍淒清野
日浮江閣寒雲界郡城興來思杖屨極目楚煙平

泊江口

武昌城外月如煙兩岸青山江上船無數客帆乘夜發

櫓聲欸乃破高眠

雪山口

楚天風雪一孤舟
永夜寒光映敝裘
萬疊帆檣雲際沒
千家烟火畫中收
茫茫祗訝山川合
歷歷還疑城郭浮
江畔淹留傷歲晚
落鳧飛雁滿滄洲

舟中立春

江上雪霏霏
春隨一棹歸
人穿荒篠出
鷺破曉煙飛
岍澗雲依滌
山遙浪拍磯
韶華催老大
佳興客中稀

雪中抵黃州

蒼茫天一色
雪岸界中流
帆影遙侵樹
山光暗入舟
風

煙寒赤壁詞賦重
黃州三楚經行徧
春來倦遠游

早發黃州二首

連朝雨雪歲將闌
枕畔江聲永夜寒
夢裏分明拜家慶
渾忘身在古齊安

雪堂瀟灑傳清興
赤壁淒其映碧流
勝蹟居狀前輩好
疎雲遠岫送孤舟

過道士袱

石影摩空秀高低
轟亂峰臨江千仞瀑
映雪萬株松青
盡埋猿穴白多印
虎蹤忽聞煙裏響
疑是暮天鐘

泊蕪溪

羣峰面面雪中看石氣嶙峋俯碧湍十日窮陰分楚界
由此而東千層細浪接雲端神鴉舞棹荒祠杳野狖窺
爲豫章境人晚樹寒敢向異鄉爭歲月飽經烽燧舊江干

抵九江二絕句

天邊極目影冥冥雪滿廬山萬仞屏乍接晴煙分遠浦
潯陽九派一時青
六代旌旄重上游當時妙選鎮江州藍輿漉酒柴桑郭
却占東南第一儔

賦得白頭浪裏出湓城

湓浦輕舟發石尤未肯降亂波浮遠郭寒雨漲春江九
派風煙國千秋戰伐艘歲闌仍作客空羨白鷗雙

湖口歲除憶舟行已三閱月賦七韻紀之

忽忽經三月舟中似卜居煙光千里濶景物一年除野
日初輝耀寒雲乍卷舒風迎孤舫慢雪界衆峰疎愁對
彭湖雁飽嘗楚澤魚江湖多遠浪鄉國少來書估客浮
家住飄飄愧不如

江上守歲二首

故園尚隔二千里使節今來四月餘歲晚山川頻阻棹
寒生雨雪久離居驚帆蹴浪鼉鼉立遠堞臨風雁鶩疎
江水遥遥通海畔憑誰先達豫章書

高枕天涯任歲徂西江波浪接南湖風吹峭壁疑飛動
雪擁廬峰乍有無荒岸烽煙酬節序野醪斟酌應屠蘇
乘流志已馳吳會一氣茫茫大小孤

戊申元旦時泊舟湖口二首

誰意荒江滄蕭狀度歲華激流差免俗泛宅尚無家
聒耳鄰舟鼓關心野戍笳終慙廬岳隱空返漢臣槎
望裏波濤合春帆此日晴山猶天外影江是去年聲濁
釀酬僮僕孤舟絕送迎流光渾易擲遠客轉須驚

過彭澤有懷陶令

古來賢達人不屑升斗祿先生其猶龍肯隨世局促種
秫信爲美折腰良足辱興至卽拂衣曾否公田熟無絃
尚可鳴有酒自狀足白眼義熙年高枕廬山曲祇今荒
江畔彷彿東籬菊千秋管幼安北海同高躅

小孤山

屹狀自鬱蒼拳石水中央峭逼波濤動寒凌日月長片
雲穿鳥徑餘雪冷僧糧愁絕攀蘿客茆亭覆上方

江干

江干頻滯棹春入怯長征日日辨風信時時計去程亂
豚吹雨出孤鶴隔雲鳴回憶衡廬色名山眼界清

人日

曉起帆餘雪春來日紀人探潮高浪過乞米小洲貧物
候江邊柳鄉心海上鱗石尤何太切幾夜馬當鄰

曉發安慶

月落早潮生乘流下皖城聽鴻疑故友使馬趁初晴岸
草新春色江濤舊戰聲青山同過客到眼費逢迎

池陽絕句二首

池陽山色晚冥冥九子峰高峙玉屏簫鼓遠來頻賽社
一江風定佛燈青

瀟灑文章杜牧之齊山秋浦兩相宜無端卻憶頭頭女
腸斷吳興出守遲

風逆二首

驚帆蹴雪已連旬日日江流負早春滿眼風波唯袖手
閒情輸與弄舟人

白浪青山相對疎江聲東去少魚書徑須險路收帆早
却望荒洲似敝廬

乘風過銅陵晚泊荻港道中作

吳楚煙波一棹通夜眠多傷白鷗叢孤帆曉落銅陵月
兩岸春生荻港風曲曲山光茆屋裏家家樹影夕陽中
千年誰續元暉咏解道澄江練許同

早發荻港將抵蕪湖道中作

野望茫茫白陽光水上浮鷗鳧春避粲星月夜隨舟曲
抱峰腰轉平涵日脚流蕪陰圖繪裏終藉午風柔

蕪湖元夕三首

客裏頻佳節浮生此上元雲涼帆有影江濶月無痕人
語隨方改燈光拂浪昏東流渾日夜今古幾詞源
月上孤舟滿潮迴兩岸平誰將山水影併入鼓歌聲伏
枕貪鄉夢乘槎憶友生鳳城多舊約聯袂九衢行
屈指春風後天涯路幾盤聽鶯過故國隨燕到長安皓
魄應同照清光只自寒那堪今夕月空對酒杯乾

過梁山晚泊采石二首

設險江干戍金陵重上游天門高并峙

梁山一石壁峭名天門

常浮浪濺寒雲濕風飄晚磬流遠燈勞指點還似泛漁
舟

勝遊疲耳目晚泊罷登臨春入魚龍氣山通潮汐音蕭
森孤棹雨峭拔半江陰高咏留清響荒祠自古今

采石阻風仍用前荻港韻

危磯東注海門通勝日淹留雨雪叢永夜濤聲迴地軸
滿山松籟響天風鄉愁未減陽和後藥味偏親旅病中
鳥逕茫茫窺絕頂爍犀無復壯懷同

偶見

偶見垂楊覆遠亭雪紋猶界亂松青
畫眉依舊眠雕檻
鴝鵒偏來浴淺汀

采石紀游

江邊人影石欄齊夕照平臨小艇低
青接遠亭斜有徑
黑窺深洞峭無梯虬枝霧結仙樓迴
鳥道雲盤大壑迷
長揖前修生逸興忘歸偏在翠螺西

金陵雜詩二十首

春日秦淮水閒通旦暮潮輕風爲借力穩送木蘭橈
夢裏江南路金陵一棹新曉來風乍起疑是故鄉春
泊舟石城側坐對棲霞山聞有探梅客山中自往還

鐘阜臨江浹千年王氣悲蒼蒼雲樹杳目斷蔣侯祠
蕭瑟青溪月風流白下塵唯餘江上水曾送六朝人
連檣自粵來經歲江干住估帆慎莫停軍符捉汝去
渡口歌桃葉歡名憶莫愁芳踪俱寂寞煙景似深秋
別樣天孫錦競奢日不同誰知機杼女夜夜泣春風
鸚鵡怯春寒對人悄不語梅花影半疎共結扁舟侶
子夜新聲歇梨園法曲殘淒涼南北里遺恨小長干
城邊舟亂行城中人未起悠悠不相問同飲建業水
南朝五百寺強半碧峰間何處尋都講名山相對閒
王謝人空盡梁陳怨未消冶城橋畔柳無復最長條

城內雞鳴山聲聲啼不歇涼雨響孤舟臥見遙煙滅
圖書荒舊宅松石散名園指點江山蹟空餘故老存
遠山青欲斷苔影碧參差處處檣烏集天涯日暮時
昔人埋骨處霸圖遞煙冷秦淮諸女兒猶照清波影
蹀躞誰家子江頭自臂鷹冶游知有地春草綠千層
朝雲水際浮流影抱天闕中有休糧僧坐擁半巖雪
獨愛江邊石微茫燕子斜烏衣非舊里飛向阿誰家

宿杜子濂高齋留贈二首

醉餘分一榻置我水雲間書幌侵蘭臭茶煙近鶴閒歸
心江浦樹雨色秣陵山入夜耽琴咏能清倦客顏

十載金門侶風流此建康離懷驚把袂鄉夢得聯牀竹
暖迴春氣梅疎續夜香扁舟從海畔歌嘯意難忘

同杜子濂夜游法黃石先生園亭

吏隱先生迴不羣名園春色許平分六朝石影呼同丈
三徑篁聲愛是君地僻巖陰寬積雪宵涼洞口養閒雲
更須秉燭陪佳賞江畔明朝別緒紛

法黃石方伯劉仁侯臬長杜子濂大叅名看吉祥

寺古梅黃石賦二律見投別後卻寄此作

梅陰深藉曲欄遮寂寂琳宮閱歲華半落乍疑三尺雪
冶游猶認六朝花同心載酒香分屐別思臨春月滿槎

歸去琅玕欣在握疎枝回首已天涯

柳

石城楊柳已毵毵低映清波色蔚藍不似梅花翻易落
帶人風雨是江南

燕子磯泊舟

羣山忽盡碧江頭片石孤撐萬里流路界荒煙斜到寺
波涵夕照暗隨舟鳥聲乍接高峰磬雲影遙侵絕浦鷗
斟酌春光巖際好徑須策杖一探幽

泊儀真南郭

春澹真州郭輕帆薄暮停羣峰聯北固一水界南冷暖
入魚苗長煙深柳眼冥夕陽紛欲下回首大江青

曉發儀真

曉問晴光鳥語知穠桃嫋娜借風吹萋萋岸艸青如許
恰似湘南十月時

將抵揚州作

輕颼吹客古揚州一棹乘春漾碧流忽訝舟行平地上
還看鳥散午溪頭菜花夾岸兒尋蝶柳影當門婦飯牛
漸近雷塘芳草路江湖回憶乍銷憂

花朝

花朝寒雨廣陵城春水迎潮細細生多少冶游湖畔去

橋邊聞折柳條聲

邵伯道中

隋苑淒涼事已徂，繞隄依舊長蘼蕪。
一帆暮雨揚州郭，二月輕風邵伯湖。
野塢煙深藏乳燕，春塘水淺露晴鳧。
小窻漫擬淮南賦，招隱千秋尚可呼。

寶應道中

如鏡夾長堤，芊綿岸草齊。
帆遙羣鳥逝，水濶一輪低。
麥隴青崖際，漁家白浦西。
春光歸甓社，日極晚煙迷。

舟過淮陰弔韓侯釣臺三首

廢臺臨古堞，夕日下淮陰。
太息王孫節，千秋不易心。

漢中臺已荒，垓下事空悵。
唯有漂母祠，知己儼相向。
勇從勝下生，禍自登壇始。
身後賢豪名，長風吹綠水。

寒食日渡黃河作

寒食影蕭蕭，長河春寂寥。
帆低涼帶雨，海近午通潮。
草色連沙暗，花光拂霧消。
年年歌瓠子，民命等蓬飄。

清河道上作

是日始登陸

登車好與踏青期，淮北春寒草色遲。
半歲煙波隨釣叟，連宵風雨妬花枝。
羊腸曲繞河流轉，蝸舍頻經決口移。
小邑蕭條人吏散，數聲啼鴉尚天涯。

所見二首

滾滾洪波徧地哀
就中鬼哭覓墳堆
經春水淺痕初露
寒食今朝築土來
漂盡禾廬更築河
故鄉那敢怨風波
淤田依舊耕將熟
準擬今年穫粒多

司吾驛早發

朝曦掩靄上荒林
野燒微茫古道侵
芳草時時通遠夢
閒雲處處識歸心
三春雪影留吳舫
臘月鴻聲憶楚吟
到眼風光看漸異
鳥啼竝入故鄉音

沂州

細艸瑯琊道
歸雲晚渡河
酒紅鄉味重
山碧夕陽多
鳩語鄰荒井
鴉巢戀舊柯
吾廬春色徧
綠可到藤蘿
曉渡沂水

郭色村光濃澹
遮清沂幾曲界
平沙草深徑僻
鶯聲絕
風動棠梨樹樹花

抵莒州僮輩有迎道左者偶書一首

鄉園漸近轉春寒
別緒關心擬萬端
恰是逢人渾忘却
匆匆剛解訊平安

雨中曉行

雨色冒平陸
遙嶺光明滅
夜來曾宿處
淡淡村煙發
布穀語方熟
喚晴鳩乍歇
掩藹櫻桃花
野岸飄芳雪
微陰

忽蕩潏泠泠幽澗折行役踏遠春屢負芳菲節園林
新霽延竚青薇蕨祓禊難及期目極翻內熱

過諸城有感二絕句

海風臺畔琅琊月夕照城邊馬耳山二十七年前過處
豕人鳥雀自飛還

舊路依稀惡夢醒當年流血草間腥黃昏古堞孤村月
尚帶磷磷鬼火青

過營丘別業

鄉味唯將濁酒親驅歌頻送又緇塵園林偶過驚同客
燕雀羣飛解避人繞舍花飄香雪滿隔離麥嫩午光勻

應知老圃關心處好趁溪南穀雨春

淄河道中

荒陵處處說齊封占盡牛山幾點峰今日殘碑俱寂寞
當年涕淚果何從

鄒平道中懷古

經術老不試千載伏生鄉眼底閱秦火牀下伏智囊刻
深乃賈禍師授非不臧當時河上叟清淨讀老莊至理
胡異同孔壁未淪亡咄哉晁大夫安知守故常

過澣山二絕句

白鷗宅已荒青山影幽獨垂釣舊時翁湖心擬結屋

菰蒲夾岸生葉葉青如剪平接麥疇風微動波光淺

漱雪亭小飲

春暮明湖側尊開晚照時蒲深青接岸荷小綠平池韶
序山川惜詞源李杜知

池卽李北海
杜子美游處

遥遥燈火散還動

濯纓思

趵突泉

濟上懸流萬壑殊空冥咫尺接平湖傍巖忽散高低雨
濺石俄傾大小珠四照山光圍雪浪一天雲影浸冰壺
樓邊白鶴傳遺趾欲向蓬瀛問有無

濟南奉別家兄

雙鴻不相見抗音思翱翔和鳴復幾時振羽忽分行載
脂千里車念別迫中腸濟水通遠夢同宿仍故鄉東西
戀岐路各慎天一方是時春欲暮狂飈日飛揚飄我若
浮雲繚繞華不岡吾廬成逆旅顧影轉蒼涼君歸汶水
上離離春草長

獻縣道中

春盡征塵裏遥遥幾月程沙平渤海路艸沒獻王城斤
鹵年年薄鶯花處處晴誰將憂歲意辛苦達承明

趙北口道中

紅塵忽界碧波迷水面斜陽映柳隄野鳥頻窺漁舍熟

春煙乍斂鷺田低吹來荇藻雲千頃望斷桑麻雨一犁
憶別木蘭舟隔月風光猶似射陽西

又口號

昔年頻過總新秋渺渺湖光接漢浮今日重來春乍暮
白鷗青艸伴漁舟

新城南遇周彝初總制之兩粵班荆共話久之別

去賦贈四章

故交邂逅惜離襟分陝仍思魯國陰路繞白溝迷古戍
鳥衝紅旆出高林東西粵海雙持節南北車塵一論心
聞道內廷多異數憑銷瘴癘答恩深

開府雄才此日振殊方風俗一時馴羈縻搖舍窺藤峽
生熟黎官雜蠻民大纛歌鐘喧海市輕帆寶玉貢波臣
二語別有所謂君行試酌貪泉飲吳隱居狀不異人

相逢意氣拭吳鉤幕府重開天盡頭嶺嶠梅枝通驛信
端州榕葉蔭溪流壯猶指顧龍文動清嘯從容蜃雨收
若問漢家銅柱績伏波橫海舊封侯

馬影車聲動隔年告虔身歷楚南偏海波自接三江靜
嶽色曾看百粵連愧采風詩通

帝座欣逢旌旆鎮蠻天班荆細話艱辛事目極五羊雲樹
邊

中州徐文侯方伯昔同寮癸丁未秋予銜
命之楚重晤汴上匆匆別去戊申初夏却寄四韻
雄藩十載借持籌客袂重分汴水秋琴鶴晝隨官閣靜
龍蛇春宴大河流梁園作賦人如霧緱嶺吹笙月似鈎
行省卽今多遠算中原民力未全休

初夏望後一日郝敏公朱右君名同巖方公吳賡
菴孫忤庭集飲祖園用杜陵游何將軍山林韻

十首

韋曲城南路探幽屢渡橋樹陰移遠照雲影遞層霄勝
業塵中賞同心物外招悠悠狀貌永晝屐齒敢辭遙

春盡方塘淺風迴小閣清分泉閒試茗選石坐聞鶯荷
盞遲新釀菹絲憶舊羹長安塵滿眼真羨此中行

丘壑從人好登臨一杖支藤枝低結戶泉竇曲通池日
澹墻陰覺風微樹杪知主賓偕落落聊共短襟披

入眼榴偏盛當階半著花松濤圍薜荔石丈傲龍蛇路
接回中近煙分谷口賒桔槔聲自遠終羨野人家
亭館何年建尊罍此日開耳疲燕市筑齒軟越鄉梅鷺
老將鷁去魚閒吹子來游人喧隔岸處處點蒼苔

忽來人境外繞座濺鳴泉過雨添松甲依風墮柳綿麥
香鋪碧浪荷小貼青錢若使圖中見還疑是輞川

茗盃朱櫻重冰絲雪藕香當筵簧語細拂水簟文涼境
逐韶光轉名因吏隱藏高城迴眺處雉堞迴蒼蒼
芳樹參差列清光共一池歌聲留白紵醉態倒青羅戲
蝶晴招侶游鳧晝哺兒菰蒲香有徑步屨更追隨
目極翻清曠遙峰亂夏雲不成南嶽隱空勒北山文白
社風期邈青門野趣分籬邊殘照色歸騎已紛紛
略爾忘歸去當如暮景何晚風樵唱入流水夕陽多轉
益山林興因成爛熳歌濯纓仍有約退食許重過

送楊鄂州樞部奉使宣諭安南

親承天語向交州妙選含香第一儔遠道莫愁多瘴
癘聖朝須信有懷柔勝遊指顧山川盡彩筆從容霧
雨收徼外舊傳銅柱蹟請纓壯志此時酬

送單拙菴先生歸高密

先生六十遽拂衣夢裏常思海上薇著書東觀不得志
飄然謝病東山歸膠西舊傳通德里濰濱重理釣漁磯
歸值園林新果熟科頭樹下弄朝暉秋來秫秫滿場圃
雙螯不讓鱸鱖肥鄰翁野老偕杯杓海鷗庭鶴供指揮
珂巷子孫多玉立清晝書聲繞絳幃人生顧此良快意
金門索米徒是非卽今高咏歸山什行間蕭散已忘機
敝廬亦在汶水畔半荒松菊掩柴扉終須曳屐相從看

海市回頭休羨五雲飛

六月伏日作

疎簾延永晝臥見火雲生返照晴添影閒階病懶行茗
翻冰簟濕扇却葛衣輕晚借微風轉低聞茉莉清

奉和家兄夏日過慈因菴同老僧寒輝論詩之作

三首

冉曾文筆好兄弟竝向雲門識晝公祇舍精言聊復爾
故園佳興許誰同池塘夢繞千山外壁壘光分七字中
長夏避人無一可遙遙跂脚挹清風

聞兄結夏覓幽鄰巷北頻期休上人辨到異同堅白馬

文成風木喻青蘋齋時薦果涼颺入雨後分泉碧乳新
郭外數椽仍接武科頭步履是閒身

冰川詩式近何如茗椀相從開士居龍樹自容分一榻
辨才奚事演三車生公好住司徒宅子幼能傳太史書

白社優游高枕後浮雲西北咏徐徐

慈因菴為先外大父所置故有生公

聯一

祖園集飲應易齋先生名

水亭遙碧浸清池蟬語幽尋步履宜籬畔豆花縈紫蔓
午餘槐葉綴青絲壺觴涼就風來處荷芰香生雨過時
天外斷虹隨馬足歸雲遠岫共參差

邵戒三見示尊翁增益先生述祖德詩長句爲贈

乃祖名經邦明嘉靖時議禮得罪郎官也詳見本詩

議禮諸臣不易得豐熙楊慎稱遺直折檻尤傳粉署郎
同時抗疏無回惑殿前拜杖侂不死扶持似是神明力
萬里投荒艸一囊精誠立破蠻煙黑鹿洞執經多北面
駸儻寧作遷人色赦書不除元祐黨窮途終老無諸國
自有文章奕葉傳憑將俎豆千秋食鳴珂世澤何綿綿
吳山越水同清白迄今五世得鳳毛珥筆池邊供史職
北堂色喜影婆娑彩筆猶能述祖德直聲髣髴在人耳
鴻文相配無終極

雨中啓事

閶闔門高四望通涼生丹陛曉光濛雲煙半濕遙山外
鵬鶚斜飛細雨中苔滿梁恩三殿影萍開太液一池風
乘秋願上金莖頌執戟長楊未許同

鄉信

鄉信來何切翻驚消息真劫灰池畔影勺水海中塵
背寧辭折坤維益不振祇愁歸夢去無處覓家鄰

秋水

秋水橋邊露氣清星河微淺月初橫不知何處涼風早
一路蛩聲直到明

送陳淠水致政歸光州

君卜何山隱言歸箕頰鄰秋聲嘶去馬落葉減征塵道
直難諧世時清許乞身耆英有舊社洛下幾閒人

雨後

涼逐雨餘生疎星照禁城鴉飛牽霽影鶴舞助秋聲玉
陛雲中洗金莖象外清羣峰遙在眼浮動日華輕

中秋後一日梁園泛舟二首

晴波深處碧浮天韋曲新開罨畫船四望樓臺分晚照
一城歌吹澹秋煙樹穿遠岸光斜入月上寒空影倒懸
緩理桂橈徐命酒夜涼燈火得流連

輕舟永夜盪清光棹引微颺繞座涼急管送聲臨水細
華燈流影入波長柳煙斜縮千條霧桂魄平鋪一鏡霜
良會渾疑塵外事醉餘高咏不知狂

夜涼絕句

夜涼擊柝罷高城露下棲鳥一半鳴銀鑰重關渾未啓
西風吹徹御溝聲

九日望石招同易齋敏公冰壺三先生怍庭北山
年丈泛舟梁園移棹訪書雲黃門聽歌劇飲四
詩紀事

共愛三秋色相携九日來晚波嵐氣合斜照水亭開萸

結搗新佩杯香理舊醅避人移小艇緩咏當登臺

携觴兼載菊共泛一塘中夕澹霜前月涼生柳外風波

澄山影見舊築雨山為水所沒雲靜雁行空絲竹行相引清宵樂

未窮

燈火參差影臨流一道斜尋歌通遠岸移棹到隣家愛

客增觴政開簾受月華秣疑銀漢裏頻許泛仙槎

良會今能幾浮生興不違樂同濠上客歌傲郢中兒露

下蒸煙濕舟迴樹影隨何須驚落帽醉任晚風吹

九月行欲盡

九月行欲盡千山變衰草凌風叩閭闔勞人起常早明

星爛震隅耿耿苦難曉寒月澹無聲流影高城皎抱寂

衆囂外冥心萬籟表鐘歇鴉半啼葉彫樹乍小侵鬢霜

氣白渾疑座中老感此歲華頻益我歸思繞

初冬望日早朝

疎星看漸沒霜滿建章宮半落松梢月遙生雁背風時

巡先冀趙遠訪陋崆峒行逐城烏起飛飛輦道中

偶做鄉中法釀黍將熟漉飲薄醉口號二首是日初雪

雪後寒輕月半昏墟邊初試甕頭渾長安處處多醞醑

鄉味偏宜自杜門

窓際時聞落葉聲天涯濁釀好誰傾醉餘萬籟俱蕭寂

唯有疎鐘出禁城

晚晴望西山殘雪憶湘江舊游

日落青門夕氣清
西山積素轉分明
霏微似練光難定
滉漾如潮勢未平
寒吹自凌黃葉盡
晚煙遙接白雲生
目窮却憶經年道
初泛瀟湘一棹輕

客歲此日由
長沙南泛

冬夜四首

酒滴槽床夜有聲
擁爐深處燭光橫
殘書更乞兒童讀
遮莫鄰家絲竹鳴

野人獨愛梅花瘦
少婦偏憐茉莉寒
好伴黔婁爲一榻
日同脩竹報平安

燈前弱女未能嗔
學語誦誦索果頻
遙憶家園梨棗會
含飴應念客中人

欹枕時聞茗盃香
紙窓不隔月微茫
瓶中膽有陶潛菊
傲盡長安幾度霜

家兄至都門二首

鄉國誰期歷劫灰
弟兄相對且銜杯
詩從瓦礫愁中老
人自滄桑閱後來
喜說高堂眠乍穩
驚聞故友骨先摧
敝廬已逐秋風盡
忍向東籬首更回

鄉信頻傳訝杳茫
相逢細話果沾裳
少陵臂痛寧關老

兄時 杞國憂多詎是狂
乍接鬚眉疑夢寐
縱譚神鬼信

荒唐虞初志怪誰能續短燭熒熒絮夜長

寒夕同家兄話長沙

卑濕經行處寒深艸未彫風煙湘水碧雨雪楚天遙
虛蠟名山屐輕迴使者輶臥游如可溯一杖狎漁樵
半生耽雅尚此夕憶曾經湖濶雲常白山多眼倍青
孤舟凌曲折久雨護精靈猶恐題詩處荒苔蝕舊銘

齋宿道士小閣

獨坐齋居靜塵緣得暫忘日寒梅影細風定鳥聲長
壁老藤蘿色心清竹柏香冷狀何處磬隨月到繩床

早入郊壇卽事

地迴巖更絕高松冒曉烟星光聯北闕霜氣澹遙天
瑞集爐香外陽迴輦道前擬從雲物裏晻靄辨豐年

送家兄歸里

華不峰側春花發玉河橋畔寒霜冽一年再賦鵲鴿別
能使天涯心斷絕春杪與兄別於濟南千里驚聞鰲臂折池裏飛

灰野流血眼底頻經閱殘劫遥遥弱弟情何切老特駕
車影蹠躩竭來燕市堅冰裂拂拭緇塵辨鬢髮餘生瓦

礫寧堪說

兄新鐫一章曰瓦礫餘生

且留共眺西山雪三旬遽覓來

時轍歸值梅花香未歇高堂強飯恣怡悅不騫不崩坤
道帖杞人無事憂心愜春時重發青青蕨坐看北雁思

燕碣

寒甚

寒甚漏無聲蕭狀毳衲輕凍禽啼古堞清磬隔重城地
迴邊風急山遙獵火明漸看銀燭滅空對曉星橫

盆梅盛開配以海棠一株因成四韻

孤山處上倦尋芳且倚如霞少女傍未接春風先欲睡
漫言冷蕊不宜狂凌霜爛熳平分艷映月娉婷暗借香
好把一杯酬二妙羅浮夢入錦雲鄉

哭綦松友學士三首

傳聞搖落語還疑夢裏依稀淚已垂懷友自傷埋玉處

脩文何似撤蓮時精魂地下常依父

松友時方讀禮

知己天涯

獨憶誰賈傅曾憐年最少如君千載事同悲

十年秘閣讀書聲澹薄羞言善宦名毳帳譚經珠錯落

荒林諫獵語縱橫朋游屢見傷離別天道何知判死生

雪夜招魂應不遠憑誰為報短詩成

先皇妙選石渠中結綬翩翩六子同晉代清言推樂廣漢

廷奇字問楊雄空山未了松楸願

松友亡去父葬期僅二日

寒日徒

悲薤露風便使驅車歸海上傷心不忍過維東

臘月芍藥

名太真白

曾逐天香春半開翻同冷蕊雪中迴祇疑重向溫湯浴

舞遍霓裳玉一堆

戊申歲除憶舊年此日泊舟湖口

去年彭蠡畔五日面廬山地險風濤逼舟輕意緒閒側
身京洛客回首楚湘間歲序勞如此何由保薜顏

澹餘詩集卷之四

終

